

Surinsula novjara kunveno en Germanio

Amri Wandel

Jam la naŭan fojon Germana Esperanto-Asocio okazigas la novjaran kunvenon *Luminesk'*, kiu provas konservi la etoson de la iama populara *Internacia Festivalo*, pli ol 30 jarojn organizite de Hans Dieter Platz (HDP). La ĉi-jara situo tamen estis unika: sur insulo Norderney, unu el la orientfrisaj insuloj en la Norda Maro. Jam la alveno estis promesplena: ĉ. 15 el la partoprenantoj renkontiĝis en la sama pramŝipo kaj gaje kune pasigis la unu-horan ŝipandon. Efektive pluraj planis preni la pli fruan pramon, kiu pro la trajdaj cirkonstancoj estis nuligita. Sekve la tuta grupeto alvenis malfrue, post la oficiala vespermanĝa horo, sed tamen neniu resits malsata, ĉar informita pri la malfruo la domo servis vespermanĝon specile por la alvenintoj per tiu pramo. Poste oni prezentis la planitan programon, kiu ne nur estis riĉa kaj varia, sed ankaŭ sen paralelaj eroj, tiel ke eblis spekti ĉiujn programerojn. Aldone al la prelegoj kaj ekskursoj okazis danclecionoj kaj manlaboro gviditaj Nicky Jenssen kaj paroliga kurso de Kristin Tytgat.

En la morgaŭa tago okazis gvidita esplorado de la urbeto. Ni konatiĝis kun la surprise luksa kinejo en la historia konvesacia halo, la preĝejo kaj multaj rakontoj pri la malgranda komunumo. Sekvis kantiga ateliero de Kajto. Poste okazis lumbilda prelego de Karl Breuninger pri la gremanaj setlantoj en Kartvelio. En la vespero okazis interesa vizito al la observatorio – amatora astronomia grupo kiu memstare konstruis imponan observatorion. La direktoro de la grupo prezentis la historion kaj belajn fotojn, kiel la Lakta Vojo kun la insula lumturo kaj aŭroro fotita sur la insulaj plaĝoj. Bedaŭrinde verajn stelojn ne eblis vidi, ĉar la ĉielo restis nubkovita, ankaŭ dum la postaj tagoj, kiuj foje eĉ estis pluvaj.

Vendrede ni aŭskutlis prelegojn pri la judaj germanlingvaj poetoj dum la Nazia regno, de Christanne Oetter, kaj *Astrofiziko por Laikoj* (kun AIS-ekzameno) de Amri Wandel. Ambaŭ prelegoj okazis kadre de la Internacia Vintra Universitato (IVU), kiu festis sian 15-an jaron. Posttagmeze okazis vizito al la Unesko-centro *Vadomaro* kie ni lernis pri la naturo de la insulo. Vespere Ulrich Brandenburg rakontis pri la transsiberia E-karavano al la UK en Koreio.

Sabatmatene okazis prelego de A. Wandel *Asteroidoj, Kometoj kaj Meteoritoj* (kadre de IVU). Pri trafikcirkloj rakontis Daniel Muehlemann. Posttagmeze okazis vizito al la domo de loka folkloro kaj orientfrisa teo-trinkado, kiu ĉarme prezentis diversajn lokajn tradiciojn, sekvita per la ban-muzeo pri la evoluo de la insulo kiel populara banloko, dum la deknaŭa kaj dudeka jarcentoj. Apartan atenton la preleganto dediĉis al la maluma periodo de la nazia regno, kiam la banado de judoj en la insulo estis malpermesita. En la vespero okazis kunveno pri Afriko kaj la UK en Tanzanio. Komence salutis Amri Wandel, vicprezidanto de UEA kaj invitis aliĝi al la UK. Sekve Costa Masavi, prezidanto de la LKK

prezentis per Zoom la kongreslandon kaj informis pri flugoj al Aruŝa, loĝado kaj ekskursoj. Pluraj el la aŭskultantoj plendis ke daŭre mankas informoj pri la UK kaj pledis por baldaŭa publikigo de la Dua Bulteno.

En la lasta tago de la jaro okazis prelegoj pri la *Plat-germana* de Franz Kruse (ankaŭ ĝi kadre de IVU), *Knedoj kaj pasto-poŝoj* (Wera Blanke) kaj *Sunhorloĝoj* (kadre de IVU kun ekzameno, de Christof Roether). La vespera programo komenciĝis per “Orientfrisa abitur-ekzameno” prezentita de Barbara Brandenburg, kiu malgraŭ ĝia nomo konsistis ĉefe el logiko-demandoj, sed necesis plenumi antaŭajn praktikajn taskojn kiel senŝeligo de salikokoj, orientfrisa te-ceremonio, kurso pri la plat-germana, gustumado de frisa vino per kulereoj ktp. Sekvis novjara koncerto de Kajto kaj silvestra balo.

Dum la unua de januaro okazis la tradicia novjara promeno, parte sub pluvo, laŭlonge de la plaĝa promenejo. Reveninte eblis aŭskulti prelegon de Guido Brandenburg *Ŝipoj kaj trajnoj* kaj sekve prelegon de Nane pri la najbara nederlanda Frislando. Dum la adiaŭa vespero oni disdonis atestilojn: unue por la orientfrisa abitur-ekzameno, kaj sekve por la tri IVU-prelegoj en kiuj okazis ekzamenoj: *Astrofiziko por Laikoj* (12 ekzamenitoj), *Asteroidoj, kometoj kaj meteoritoj* (9) kaj *Sunhorloĝoj* (6). Post la resumaj vortoj de la organizantoj kaj adiaŭa kanto de Kajto oni ankoraŭ longe sidis kaj babilis en la gufujo (vintra ĝardeno), kvazaŭ rifuzante forlasi la agrablan etoson. En la sekva mateno ĉiuj devis jam adiaŭ la insulon Norderney, prenante la pramon reen al la kontinento.